

# Infurmaziuns en pled e maletg

Exposiziun professiunala «Fiutscher»

DA GION NUTEGN STGIER / ANR

■ **Per la quarta giada ha lieu a Cuira l'exposiziun professiunala che sa drizza cunzunt a scolars e scolaras da la scola superiura. Ier ha gi lieu l'avertura da l'occurrenza nua che 150 professiuns vegnan preschentadas en pled e maletg.** En il fratemp è l'exposiziun professiunala «Fiutscher» nagin tip secret pli cun esser stadas las trais d'ediziuns in vair success. Er da preschent è l'interess per l'occurrenza da professiun grond, èn annuziads 3500 scolars e scolaras da las classas superiuras. Per l'organisaziun segna danovamain l'Uniun grischuna d'artisanadi e mastergn. President dal comité d'organisaziun è *Rico Cioccarelli*, el ch'è gia dapi blers onns fitg activ quai che pertutga la promoziun professiunala.

## 150 professiuns

L'exposiziun ha lieu en la halla da la citad da Cuira e sin l'areal da la Higa. L'occurrenza sa drizza bain a giuvenils che stattan avant la decisiun da far in emprendissadi, dentant profiteschan er geniturs, patruns e scolasts da l'exposiziun professiunala. A pled tar quella vegnan emprendists che sa chattan en lur scolaziun da professiun ed intgins patruns che dattan gugent infurmaziuns che pertutgan ina da las 150 professiuns che vegnan preschentadas anc fin dumengia proxima. Ils visitaders han er



In post fix tar l'exposiziun professiunala «Fiutscher» ha er quest onn l'agricultura.

MAD

chaschun da vegnir en contact cun singuls materials, da lavurar cun quels e da daventar activs. Mussadas vegnan lura er anc las 250 scolaziuns supplementaras che giuvenils e creschids han chaschun da far sunter avair fatg cun success in emprendissadi. Cun l'exposiziun da professiun «Fiutscher» vulan ils organisaturs er far attent a las grondas valurs da far in emprendissadi e lura er da sa decider da far in emprendissadi manual.

## 80 expositurs

Ina finamira da l'exposiziun professiunala «Fiutscher» è er da far attent ils giuvenils als avantatgs ed er als dischavantatgs da mintga professiun. Quai fan per gronda part gist ils 80 expositurs ch'èn da la partida e che dattan cun plaschair las infurmaziuns necessarias. Na la quantiad saja da gronda impurtanza, mabain la qualiad, punctuescha Cioccarelli. In dals puncts culminants da l'exposiziun professiunala «Fiutscher» è la concurrenza da seleziun dals lainaris per il campiun mundial da professiuns «World Skills» ad Abu Dhabi. Quella seleziun ha lieu mintga di ed è er publica. Nov è er ch'i dat mintga di guidas tras l'exposiziun professiunala e quai cun infurmaziuns en diesch linguas. Damaun a las 17.00 ha lieu ina guida cun varsaquants prominents da la politica, da l'economia, dal turissem e da l'agricultura.